

四書溫故錄

重輯孟子章指

仁和趙佑學

予辨孟子疏之僞。因就疏中輯出趙氏章指一卷。古人注書。罕章旨之說。自趙岐注孟子始。而邢昺論語疏。因之。朱子集註。又因之。蓋本易繫辭辭也者。各指其所之意。題辭所云。章別其旨。分爲上下。是也。卽疏本各卷題。各章首。所載正義曰。此章言以下云云者。今謂之提綱。原皆趙氏正文。繫在各章注末。間用韻語。與全疏體絕不類。唐陸善經以其煩重。刪去之。孫氏作音義。仍存之一例。爲之訓釋。本與注連。朱註亦

時引用

如主之臣章小弁章求則得之章未載趙氏曰皆是

蓋皆据趙氏原文

而今僅見于正義曰下則爲疏而非注厥由僞疏不

顧重複襲爲疏首明人刊定不知去疏而反刪注遂

致盡沒本來然猶間出趙云于其中其梁惠王章句

下疏明有據此卷章指云云予因得以考見而重輯

之稍論其可疑者爲之案於乎趙注已非完本其略

見于疏而不見于注者多矣

如好辨章疏末載注禹稷胙祫周公仰思仲尼

三語此類非一獨此章指尙可粗還其舊予嘗謂僞

疏功不補患所宜從廢今不察凡此章云云之無非

趙云徒截音義之爲章指釋者別贅疏尾割裂遷就  
益使彼此俱不成章何若盡剔疏專存注以章指分  
補之而繫孫氏文于後與集註並行其于異同得失  
豈不粲然明白無復魚目之混也

孟子見梁惠王章 此章言治國之道當以仁義爲  
名也

王立於沼上章 此章言聖王之德與民共樂恩及  
鳥獸也

梁惠王曰章 此章言主化之本在於使民養生送

死之用足備也。

寡人願安承教章

此章言王者爲政之道在生民

爲首也。

佑案此章正義曰下有此一段宜與前段合爲一

章趙氏分別之三語乃疏之妄臆今去

晉國章 此章言百里行仁則天下歸之也

孟子見梁襄王章 此章言定天下者一道而已不

貪殺人人則歸之也

齊宣王問曰章 此章言燕趙攸戰帝王之道無傳

霸者之事也。

莊暴章 此章言人君田獵以時鐘鼓有節與民同樂也。

齊宣王問章 此章譏王廣園專利嚴刑陷民也。

交鄰國章 此章言聖人樂天賢者知時仁者必有勇也。

雪宮章 此章言與天下同憂者不爲慢遊之樂不循肆溢之行也。

明堂章 此章言齊王好貨色孟子推以公劉太王

好貨色責難于君也。

王之臣章。此章言君臣上下各勤其任無墮厥職。乃安其身也。

佑案此卽今集註圈外所載趙氏曰者也。以此推之卽知各章疏首所稱正義曰此章言云云皆出趙氏本文所謂章別其旨是已。孫氏本以作音故有墮許規切亦音惰下不墮同之語卽與上比其丁必二切及也語相連以章指原與注連也。自注脫而疏存校書者不察遂將音義之爲章指釋者。

截分子疏下有似孫氏自作疏而自音之從古既  
無此例又似作疏在先音義在後與孫序不合自  
此章以後隨處舛謬其尤可嗤者莫如前梁惠王  
章句上題下注一大段自梁惠王者魏惠王也起  
至而爲之一例者也止中共三爲字並無一應讀  
去聲者乃監本忽于其下截音義爲于僞切下爲  
王爲其曰爲抑爲爲是故爲皆同不知此音義乃  
當在首章末何必曰利之下因王曰安節注有亦  
將有以爲寡人興利除害句而設其下爲王云云



皆同則連下數節數章直至齊宣王章末經及注所有應讀去聲之爲字而并釋之者何當謾躐于前故并而論之其餘不暇細摘云

所謂故國章 此章言人君進賢退惡翔而後集有世賢臣乃爲舊可法則也

佑案翔而後集四字奏語也

湯伐桀章 此章言紂崇惡失其尊名不得以君臣論之欲以深寤宣王垂戒于後也

佑案舊于言下衍孟子云三字今去

爲巨室章

此章言任賢使能不遺其學則功成而

不墮也

齊人伐燕章

此章言征伐之道當順民心也

齊人伐燕取之章

此章言伐惡養善無貪其富以

小王大將何懼也

鄒與魯圍章

此章言上恤其下則下赴其難惡出

於已則害及其身如影響也

滕文公問章

此章言事無禮之國不若得民心與

之守死善道也

齊人將築薛章

此章言君子之道正已任天強暴

之來非已所招謂窮則獨善其身也

滕文公問章

此章言太王去邠權也效死守業義

也

魯平公章

此章言讒邪構賢賢者歸天不尤人也

公孫丑問章

此章言德流之速過于置郵君子得

時大行其道管晏雖勤猶爲曾西所羞也

不動心章

此章言以義行勇則不動心養氣順道

無效宋人聖人量時賢者道偏孟子究言情理端

學於孔子也。

以力假仁章 此章言王者任德霸者兼力力服心服優劣不同也。

仁則榮章 此章言國必修政君必行仁禍福由己不專在天當防患于未亂也。

尊賢使能章 此章言修古之道鄰國之民以爲父母行今之政自己之民不得而子是故衆夫擾擾非所常有命曰天吏明天所使者也。

人皆有章 此章言人之行當內求諸已也。

四書章句  
三  
矢人章 此章言各治其術。術有善惡。禍福之來。隨  
行而作。恥爲人役。不若居仁。治術之忌。勿爲矢人  
也。

子路人告之以有過章 此章言大聖之君。猶采善  
于人也。

伯夷章 此章言伯夷。柳下古之大賢。猶有所闕也。  
佑案疏脫柳下二字。今補。

天時不如地利章 此章言民和爲貴也。

孟子將朝王章 此章言人君以尊德樂義爲賢。君

子以守道不回爲志者也。

陳臻問章。此章言取與之道必得其禮於其可也。雖少不辭。義之無處。兼金不顧者也。

平陸章。此章言人臣以道事君。否則奉身以退也。

蚯蚓章。此章言執職者劣。藉道者優也。

爲卿于齊章。此章言道不合者。不相與言也。

自齊葬魯章。此章言孝必盡心。匪禮之踰也。

沈同章。此章言誅不義者。必須聖賢。禮樂征伐。自

天子出。王道之正者也。

燕人畔章 此章言聖人親親不文其過小人順非以誦其上者也。

孟子致爲臣章 此章言君子正身行道道之不行命也不爲利回也。

留行章 此章言惟賢能安賢智能知微以愚喻智道之所以乖也。

尹士章 此章言大德洋洋介士察察賢者志其大者不賢者志其小者也。

充虞章 此章言聖賢興作與天消息天非人不因。

人非天不成也

居休章 此章言祿以食功志以率事無其事而食其祿君子不由也

滕文公爲世子章 此章言人主當則聖人秉仁行義者也

滕定公章 此章言事莫當于奉禮孝莫大于哀慟從善如流文公之謂也

問爲國章 此章言尊賢師知采人之善修學校勸禮義勅民事正經界均井田賦什一則爲國之大



本也

許行章

此章言神農務本教以凡民許行蔽道同

之君臣陳相背師降于幽谷不理物情謂之淳樸

者孟子至終而闢之也

佑案舊脫孟子至終而闢之也句誤竄疏末今補

墨者章

此章言聖人緣情制禮奉終墨子互同質

而違中以直正枉憮然改容而受命也

陳代章

此章言修禮守正非招不往枉道富貴君

子不許也

景春章

此章言以道匡君非禮不運故妾婦以況

儀衍者也

周霄章

此章言君子務仕思播其道達義行仁待

禮而動也

彭更章

此章言百工食力以祿養賢修仁尚義國

之所尊移風易俗其功可珍雖食諸侯不爲素飧

者也

萬章問章

此章言修德無小暴慢無強也

戴不勝章

此章言自非聖人在所變化故諺曰白

沙在泥不染自黑蓬生麻中不扶自直之類也

不見諸侯章 此章言道異不謀迫斯強之段泄已甚矧亡得其宜正已直行不納于邪赧然不接傷若夏畦也

佑按迫斯強之語意未達然段泄已甚即前注魏文侯魯繆公有好善之心而此二人距之太甚意也疏則謂是皆文侯繆公就見已甚迫切顯然矛盾矣

戴盈之章

此章言從善改非坐而待旦知而爲之

罪重于故辟猶攘雞多少同盜發罪連然後可也  
好辨章 此章言憂世撥亂勤以濟之義以匡之也  
陳仲子章 此章言聖人之道親親尙和志士之操  
耿介特立可以激濁不可常法者也  
離婁章 此章言雖有巧智猶須法度固由先王禮  
義爲要不仁在位播越其惡誣君不諫謂之賊明  
上下相須而道化行也

規矩章 此章言法則堯舜鑒戒桀紂也

三代之得天下章 此章言人所以安莫若爲仁惡

而弗去。患必及身。自上達下。而其道一也。

愛人章。此章言行有不得於人。反求於身。是爲青  
已之道也。

人有恒言章。此章言天下國家各依其本。本正則  
立。本傾則踣也。

佑案。本正二句。已見注中。蓋疏之誤。復當去凡疏  
載章旨。可削處亦多。但原本已失。難悉正耳。

爲政不難章。此章言天下傾心思慕向善。臣民不  
罪。咸以爲表德之流行。可以充四海也。

佑案注以巨室謂賢卿大夫之家人所則效者故有向善之說賢字着意疏脫去之則失其指然今之集註亦所未及故附論于此

天下有道章 此章言遭衰逢亂屈伏強大據國行仁天下莫敵雖有億衆無德不親執熱須濯明不可違仁也

不仁者章 此章言人之安危皆由於已也

桀紂章 此章言水性趨下民樂歸仁桀紂毆使就其君三年之艾畜而可得一時欲仁猶將沉溺所

以明鑑戒也。

自暴者章

此章言曠仁舍禮自暴棄之道也。

道在爾章

此章言親親敬長近取諸已則邇而易

者也。

居下位章

此章言事上得君乃可臨民信友悅親

本在于身也。

伯夷辟紂章

此章言養老尊賢國之上務七年爲

政以勉諸侯者也。

求也爲季氏宰章

此章言聚斂富君棄於孔子重

人命之至也。

存乎人者章。此章言目爲神候精之所在。存而察之。善惡不隱也。

恭儉章。此章言人君恭儉率下。人臣恭儉明其廉忠也。

淳于髡章。此章言權時之義者也。

君子之不教子章。此章言父子至親。相責則離。易子而教。相成以仁。教之善者也。

事執爲大章。此章言上孝養志。下孝養口體也。



人不足與適章

此章言小人爲政不足閒非賢臣

正君使握道機君正國定下不邪侈將何間者也

有不虞之譽章

此章言不虞獲譽求全受毀者也

人之易其言章

此章疏全脫無從考見章指

人之患章

此章言君子之患在好爲人師也

佑按此章空舉經文疑亦脫而妄綴者

樂正子章

此章言尊師重道敬賢事長人之大綱

樂正子好善孟子譏之責賢者備也

孟子謂樂正子章

此章言學優則仕仕以行道否

則隱逸鋪啜沈浮君子不與是以孟子咨嗟樂正子者也

不孝章 此章言量其輕重無後爲不孝之大者也

仁之實章 此章言仁義之本在孝弟蓋有諸中而

形於外也

天下大悅章 此章言以天下富貴爲不若得意於

親也

舜生於諸馮章 此章言聖人殊世而合其道也

子產章 此章言重民之道平政爲首也

孟子告齊宣王章

此章言君臣之道以義爲表以

恩爲裏相應猶若影響舊君之服蓋有所興諷諭  
宣王勸以仁也

無罪而殺士章

此章言君子見幾而作也

君仁莫不仁章

此章言國君率衆仁義是上爲下

效者也

佑按此章云云已盡注中蓋趙氏之爲章指固有  
可省而復說者拘于例也陸氏以其煩重刪去之  
爲是故歟但不應盡棄古人耳至此章經之非重

出極易見張氏何以妄議集註正之而今之村塾猶有不察而置之者吾轉憾文公之載張氏曰爲多事也

非禮之禮章 此章言禮義人之所以折中履其正者乃可爲中是以大人弗行之也

中也章 此章言父兄之賢而子弟既頑教而不改乃歸自然也

佑按此數語于章指殊未當

人不爲章 此章言貴賤廉恥乃有不爲不爲非

義義乃可由也

佑按貴賤廉恥四字疑有誤廉當作知

言人之不善章

此章言好言人惡殆非君子者也

仲尼章

此章言疾之已甚亂者也

大人者章

此章言大人之行行其重者不信不果

求合義也

赤子之心章

此章言人之所愛莫過赤子所謂視

民如子則民懷之者也

佑案

注大人謂君國君視民當如赤子不失其民

心之謂也。一說曰：赤子嬰兒也。少小之子專一未變化，人能不失其赤子時心，則爲真正大人也。蓋雖兩說竝載，而仍主前說，故其爲章指如此。疏則兩岐不相貫，今註始專從後說。

養生者章 此章言養生竭力，人情所勉，哀死送終，謂之大事也。

君子深造章 此章言學必根源，如性自得者也。  
博學章 此章言廣尋道意，詳說其事，要約至義，還反於樸者也。

佑按注末有是謂廣尋道意還反于樸說之美者也。三語則此四語或當在注首而後應之者蓋不能悉辨矣。

以善服人章 此章言五霸服人三王服心其服則一功則不同也。

言無賢章 此章言進賢受上賞蔽賢蒙顯戮者也。

徐子曰章 此章言有本不竭無本則涸也。

人之所以異於禽獸章 此章言禽獸俱含天氣衆人皆然聖人超絕識仁義之主於已者也。

爾惡旨酒章

此章言周公能思三王之道以輔成

王也

佑案此與下兩章定從集註皆統承上章言之趙氏不得其要故各爲之旨而此章專主于周公王者之迹熄章此章言時無所詠春秋乃興假史記之文孔子正之以匡邪也

君子之澤章此章言五世一體上下通流君子小人斬各有時孟子恨以不及仲尼也

可以取章此章言兼勇惠三者人之高行也



逢蒙章

此章言求交取友必得其人也。

西子章

此章言貌好行惡。西子冒臭。醜人潔服。供

事上帝。明當修飾。惟義爲常也。

天下之言性章

此章言能修性守故。天道可知也。

公行子章

此章言循理而動。不合時人也。

君子所以異於人章

此章言君子責已。小人不改。

比之禽獸。故不足難也。蹈仁行禮。不患其患也。

禹稷顏子章

此章言顏子之心。有同禹稷者也。

匡章章

此章言匡章得罪。出妻屏子。上不得養。下

以責已衆人以爲不孝孟子以爲禮貌之者也

曾子子思章 此章言曾子子思處義非謬者也

儲子章 此章言人以道殊賢愚體別也

佑案第二句稍背蓋有誤當考

齊人章 此章言小人苟得妻妾猶羞也

舜往于田章 此章言夫孝百行之本無物以先之

雖富有天下而不能取悅于父母也

詩云娶妻章 此章言仁聖所存者大舍小從大達

權之義不告而娶守正道也

四書古金  
卷一  
二  
佑案此章之指甚不該括蓋趙說多有牽者

象曰以殺舜爲事章 此章言仁人之心如是也

咸仰蒙問章 此章言孝莫大於嚴父行莫過於烝

烝也

佑案嚴父下有而尊之矣四字烝烝下有而執子

之政五字誤衍顯然今去

堯以天下與舜章 此章言德合於天則天爵歸之

行歸于人則天下與之也

人有言至於禹章 此章言義於人則四海宅心守

正不足則賢位莫繼者也。

佑案此章不能得指義於人三字亦有脫舛。

伊尹章 此章言賢達之理世務推政以濟時不枉道以取容期于益治而已者也。

或謂孔子章 此章言君子大居正以禮進退屈伸達節不違貞信故孟子辯之以正大義也。

百里奚章 此章言君子時行則行時舍則舍故能顯君明道不爲苟合而爲正者也。

伯夷章 此章言聖人由力力有常也賢者出巧巧

可增也。仲尼天高不可階，他人跽踈猶可踰。所謂小同而大異者也。

北宮錡章。此章言聖人制祿，上下等差，貴有常尊，賤有等威。諸侯僭越，滅籍從私。孟子略紀，言其大綱，以答北宮錡之問也。

問友章。此章言匹夫友賢，下之以德，王公友賢，授之以爵，大聖之行，千載爲法者也。

交際章。此章言聖人憂民，樂行其道，苟善辭命，不爲逆距，不合則去，亦不淹久，蓋仲尼行止之節也。

仕非爲貧章 此章言國有道則能者處卿相國無  
道則聖人居乘田量時安卑不受言責獨善其身  
者也

不託諸侯章 此章言知賢之道舉之爲上養之爲  
次不舉不養賢惡肯歸是以孟子上陳堯舜之大  
法下刺繆公之不洪者也

不見諸侯章 此章言君子之志志于行道不得其  
禮亦不苟往者也

一鄉之善士章 此章言好高慕遠君子之行樂其

崇茂者也

佑案行疏本作道據此章經及注皆無行字而音義有行下孟切則爲章指設道當作行也疏末引詩高山仰止景行行止二行字皆不讀去聲且無疏自作音之理今本截分音義大謬

問卿章 此章言國須賢臣必擇忠良者也

佑案忠良下尙有親近貴戚或遭殃禍二語全非經及注應有不知何以誤衍今去此章疏末一段忽稱如紂之無道微子比干諫之而不聽一則雖

爲之見剖一則抱祭器而從周伊尹發于有莘之野而爲殷湯興治天下蓋亦本湯立賢無方故也宜孟子以是而告齊王語甚散亂音義亦有伊發有莘爲殷興道并載丁云則非疏之妄捏必是注原有文而今失之難悉按矣姑附論于此

告子曰性章 此章言養性長義順夫自然殘木爲器變而後成孟子拂之不假以言也

湍水章 此章言人之欲善猶水好下迫勢激躍失其素真是以守正性爲君子隨曲折爲小人也



生之謂性章 此章言物雖有性性各殊異惟人之性與善俱生者也

食色章 此章言事者雖徇外行其事者皆發于中明仁義由內所以曉告子之惑者也

孟季子章 此章言凡人隨形不本其原賢者達情知所以然季子言之猶若告子公都受命然後乃理者也

佑案季子言之舊誤爲信之今改正

公都子曰告子曰章 此章言天之生人皆有善性

引而趨之。善惡異衡。高下自懸。賢愚行殊。尋其本者。乃能一諸著也。

富歲章 此章言人稟性俱有好憎。耳目口心所悅者。同或爲君子。或爲小人。猶蓬麥不齊。雨露使然者也。

牛山章 此章言秉心持正。使邪不干。猶止斧斤。不伐牛山。則山木茂。人則稱仁也。

無或平章 此章言奔雖小數。不精不能。一人善之。十人惡之。雖竭其道。何由能成者也。

佑案此直以言弈爲章旨非

魚我所欲章 此章言舍生取義善之大者也。簞食  
萬鍾用有輕重縱彼納此蓋違其本。凡人皆然。君  
子則否。所以殊也。

仁人心也章 此章言由路求心爲得其本。追逐雞  
犬務其末也。學以求之詳矣。

無名之指章 此章言舍大惡小不知其要。憂指意  
心不卽於道是以君子惡之者也。

桐梓章 此章言莫如養身而養其樹木。失事違務。

不得所急所以誠未達者也

人一於身也章 此章言養其行治其正俱用智力

善惡相厲是以君子居處思義飲食思禮者也

鈞是人也章 此章言天與人性先立其大心官思

之邪不乖越故謂之大人者也

天爵章 此章言古修天爵自樂之也今要人爵以

誘時也得人棄天道之忌也惑以招亡小人之事者也

佑案音義樂音洛釋經也下自樂而樂皆同總釋

此章指及下章樂字也。惟其爲注本文也。奈何讀者。但知爲疏之提綱哉。

欲貴章。此章言所貴在身。人不知求膏粱文繡。已之所優。趙孟所貴。何能比之。是以君子貧而樂也。仁之勝不仁章。此章言爲仁不至。不反諸已。謂水勝火。熄而後已。不仁之甚。終必亡矣。爲道不卒。無益於賢者也。

五穀者章。此章言功毀幾成。人在慎終。五穀不熟。夷稗是勝。是以爲仁必其成也。

羿之教人射章。此章言事各有本。道有所隆。敷張  
規矩。以喻爲仁。學不爲仁。猶是二教。失其法而行  
之者也。

伯案。此似承上兩章言異。

任人章。此章言臨事量宜。稱其輕重。以禮爲先。食  
色爲後者也。

曹交章。此章言天下大道。人病不求。不患不能。是  
以曹交請學。孟子辭之者也。

小弁章。此章言生之膝下一體而分。喘息呼吸。氣

通於親。當親而疏。怨慕。號天。是以小弁之怨。未足以爲愆也。

佑案。此卽今集註所載趙氏曰者。

宋牼章。此章言上之所欲。下以爲俗。俗化于善。久而致平。俗化于惡。久而致傾者也。

居鄒章。此章言君子交接。動不違禮。享見之儀。亢答不差。是以孟子或見或否。各以其宜者也。

佑案。亢答句疑。

淳于髡章。此章言見幾而作。不俟終日。孔子將行。

冕不及稅庸人不識課以功實淳于雖辨終亦屈服正者勝也

五霸者章 此章言王道淩衰轉爲罪人孟子傷之是以博思古道以匡時君也

魯欲使慎子章 此章言招攜懷遠貴以德禮賤其用兵義勝爲上戰勝爲下明賤戰者也

今之事君者章 此章言善爲國者必藏于民賊民以往其餘何觀易俗移風非樂不化以亂齊民不知其善者也



作按無故言樂非章旨蓋後四句衍

白圭章 此章言先王典禮萬世可遵什一供貢下  
富上尊裔土簡情二十而稅圭欲法之孟子斥之  
以王制者也

伯按而稅下倘有二語貪衍無謂今去

丹之治水章 此章言君子除害普爲人也白圭壑  
鄰亦以狹矣是故賢者志其大者遠者也

君子不亮章 此章言重信之至者也

魯欲使樂正子章 此章言好善從人聖人一樂禹

聞讜言。答之以拜。訑訑距之。善人亦逃。善去惡來。道若合符者也。

陳子章。此章言仕雖正道。亦有量宜。聽言爲上。禮貌次之。困而免死。斯爲下矣。滿此三科。無疑者也。辨發章。此章言聖賢困窮。天堅其志。次賢感激。乃奮其意。凡人佚樂。以喪知能。賢愚之敘者也。佑案。注讀知生之知。爲智解。死于安樂。爲亡其智。能。故云以喪知能。唯陸如字疏從之。與今註同。以章指本。非疏之本說也。

教亦多術章 此章言學而見賤恥之大者。傲而厲之能者。以改教誨之方。或折或引。同歸殊塗。成之則一者也。

盡心章 此章言盡心竭性。足以承天。殀壽禍福。秉心不違。立命之道。性是爲珍者也。

莫非命章 此章言人必趨命。貴受其正。巖牆之疑。君子遠之者也。

求則得之章 此章言爲仁由己。富貴在天。如不可求。從吾所好者也。

佑案如不二句疏本無之今依集註補

萬物皆備章 此章言身必以誠恕已而行樂在其

中仁之至者也

佑案身字舊誤爲每今改正

行之章 此章言人有仁端達之爲道凡人用之不知其爲寶也

人不可章 此章言恥身無分獨無所恥斯必遠辱不爲憂矣

佑案此章語意未醒不如僞疏人能無恥而尙有

羞恥說第二句似較明

恥之於人章 此章言不慕大人何能有恥者也

佑案注以不恥不若人二句爲不恥不如古之聖賢何能有聖賢之名故其爲章指如此又案疏末載注陽朋顏淵正義曰凡於趙注有所要者雖于文段不錄然于事未嘗敢棄之而不明今有以陽朋不及黃帝佐齊桓以有勲顏淵慕虞舜仲尼嘆庶幾也云云一大段語甚鶻突是必趙注原有是以陽朋不及黃帝至庶幾也四句或在注末或在

此章言二句下而今失之。玩疏先言文段不錄。此卽陸善經所刪而疏存之者耶。然不可考矣。古之賢王章。此章言王公尊賢以貴下賤樂道忘勢。不以富貴動其心者也。

宋句踐章。此章言內定常滿。器器無憂。可出可處。胡云以遊修身立世。賤不失道。達善天下。乃用其寶。句踐好遊。未得其要。孟子言之。然後乃喻也。待文王章。此章言小人待化。乃不邪辟。君子特立。不爲俗移。故稱豪傑自興者也。

附之以韓魏章

此章言人情富盛莫不驕亢有若

欲然謂不如人非但免過卓絕乎凡也

以佚道章

此章言勞人欲以佚之殺人欲以生之

則民不怨者也

霸者之民章

此章言王政皞皞與天地同流霸者

德小民人速觀是以賢者志其大者也

仁言章

此章言明法審令民趨君命崇寬務化民

愛君德故曰移風易俗莫善于樂者也

人之所不學章

此章言本性良能仁義是也達之

天下恕乎已者也。

舜之居深山章。此章言聖人潛隱若神龍亦能飛天亦能潛藏同舜之謂也。

佑案數語義精而濶乃章旨之絕佳者已詳溫故錄中上仁言章疏云蓋移風易俗莫善于樂此禮之文然也此章疏又稱注聖人潛隱若神龍者蓋周易乾卦之文也趙注引之以解其經足明今本之失去章旨皆明人刊定之咎矣潛隱之隱當作見姑仍之。



無爲其所不爲章 此章言已所不欲勿施于人仲尼之道也。

人之有德慧章 此章言孤孽自危故能顯達膏粱白止多用沈溺是故在上不驕以戒諸侯也。

有事君人章 此章言容悅凡臣社稷股肱天民行道大人正身凡四科優劣之差者也。

三樂章 此章言保親之養兄弟無他誠不愧天育養英才吾人能之樂過萬乘孟子重爲一章再云者也。

廣土衆民章 此章言臨蒞天下君國子民君子之樂尙不與存仁義內外充身體履方四體不言蟠辟用張心邪意溺進退無容於是之際知其所不同也

佑案蟠辟用張漢魏間人疵語宋人所不爲

善養老章 此章言王政普大教其常業各養其老使不餒乏二老聞之歸身自已所謂衆鳥不羅翔鳳來集之類者也

易其田疇章 此章言教民之道富而節用蓄積有

餘焉有不仁故曰倉廩實知禮節也

孔子章

此章言能大明者無不照志聖道者成其仁也

雞鳴章

此章言好善從舜好利從蹠明明求之常

若不足君子小人各一起也

楊子章

此章言楊墨放蕩子莫執一聖人量時不

取此術孔子行止惟義所在者也

飢渴章

此章言飢不妄食恐情節欲賤不失道不

爲苟求能無心害夫將何憂者也

佑案賤不失道此卽今註言貧賤意所本

柳下惠章 此章言柳下惠不恭用志大也無可無  
否以貴爲賤者也

有爲者章 此章言爲仁由已必在究之九軻而輟  
無益成功者也

堯舜章 此章言仁在性體而行仁本性之自然者  
也

佑案此章疏有脫誤疑章指止仁在性也一語以  
下自爲疏之正文堯舜體而行仁與湯武利而行

仁五霸強而行仁一例脫去堯舜二字遂致誤連性體爲句未知然否姑仍舊錄之

伊尹章

此章言憂國意家意在出身志在寧君放

惡攝政伊周有焉凡人志異則篡心生也

佑案忽及周公不知伊尹放桀乃人臣之行權周公攝政是冢宰之正經漢儒皆誤于居攝踐阼之文故至乖異百出宋儒辨明卽無此論矣

不素餐章

此章言君子正己以立于世世美其道

君臣是貴所過者化又何素餐之謂也

王子墊章

此章言人當尙志於善也善之所由仁

與義也欲使王子無過差者也

佑案王子不知士孟子告之未必有勸諫王子意  
末句蓋贅疏遂衍爲欲使王子墊於無過之地其  
解兩惡在忽承上言非仁非義者亦以所居有惡  
疾在于仁所行有惡疾在于義是也絕不顧背經  
背註并背音義不通乃爾固未足與語章指云  
仲子章 此章言事有輕重行有大小以大包小可  
也 以小信大未之聞者也

桃應問章 此章言奉法承天政不可枉大孝榮父  
遺棄天下虞舜之道趨將若此孟子之言揆聖意  
者也

孟子自范之齊章 此章言人性皆同居使之異君  
子居仁小人處利譬如王子殊于衆品者也  
佑案此章上正義曰下獨有趙云二字蓋凡疏所  
述此章言云云皆趙氏本文皆當有趙云二字而  
失之者此其僅存可以例推也

孟子曰王子章 此章言與服器用人同不殊尊貴

居之志氣以舒此章宜與上章合而爲一不當分而爲二也

佑案此二節定從集註與上爲一章注疏音義並同唯疏于盡心卷首以此爲第三十七章而撮載前四語于其下蓋趙氏雖不主分章猶仍舊人章數令并錄之以存原說焉

食而弗愛章此章言取人之道必以恭敬恭敬貴實虛則不應實者謂敬愛者也

形色章此章言體德正容大人所履者也



佑案此章注爲趙氏之最劣宜其章指不明

短喪章 此章言禮斷三年孝者欲益富貴怠厭思

減其月君子正言不可阿情丑欲替之故譬以紵

兄徐徐者也

君子之所以教者章 此章言教人之術莫善五者

養育英才君子所珍聖所不勸其惟誨人者也

道則高矣章 此章言曲高和寡道大難迫然而履

正者不枉執德者不回故曰人能宏道丑欲下之

非也

天下有道章 此章言窮達卷舒。屈伸異變也。

勝更章 此章言學尚虛已。師誨貴平。是以勝更恃。

二孟子弗應者也。

於不可已章 此章言賞僭及淫。刑濫傷害。不僭不。

濫。詩人所紀。是以季文三思而後行之者也。

作案。注主用人說。本模糊。而數語更不倫。

君子之於物章 此章言君子布德。各有所施。事得。

其宜。故謂之義者也。

知者無不知章 此章言振裘持領。正羅帷綱。君子。

百行先務其崇是以堯舜親賢大化以隆道爲要者也。

佑案此章前二語已見于卷首疏爲第四十七章指而本章闕載疏末引荀子云若挈裘領屈五指而頓之順者不可勝數史云綱舉而網疏提其綱則衆目張明爲二語設而原本脫去今補。

梁惠王章 此章言發政施仁一國被恩好戰輕民災及所親著此魏王以戒人君者也。

春秋章 此章言春秋撥亂時多爭戰事實達禮以

之反正諫討征伐故不自王命曰無義者也

盡信書章

此章言文之過實聖人不改錄其意也

有人曰章

此章言民思明君若早望而以仁伐暴

誰不忻喜是以殷民厥角周師歌舞焉用善戰者也

梓匠輪輿章

此章蓋喻人不志仁雖前典憲不能

以善

佑案此三句在注末卽趙氏章旨正文之僅存者  
今就注錄出不復用疏其喻仁甚迂然疏更衍爲

喻當時之君益遠

舜之飯糗章 此章言阨窮不憚貴而思降凡人所難舜隆聖德所以殊者也

吾今而後章 此章言恕以行仁遠禍之端暴以殘民招咎之患是以君子好生惡殺反諸身者也

古之爲關章 此章言脩理關梁譏而不征加以稅歛非其程式懼將爲暴故譏之也

身不行道章 此章言率人之道躬行爲首者也

周于利章 此章言務利蹈姦務德蹈仁舍生取義

其道不均者也。

好名章

此章言廉貪相殊名亦卓異者也。

不信仁賢章

此章言親賢正禮明其五教爲政之

源聖人以三者爲急也。

不仁章

此章言王者當天然後處之桀紂幽厲雖

得猶失不爲得者也。

民爲貴章

此章言得民爲君得君爲臣論君民社

稷之輕重也。

聖人章

此章言伯夷柳下惠變貪厲薄千載聞之

猶有感激謂之聖人美其德也

佑案疏末云注顏食至美其德此蓋于上篇言之詳矣可見各章指之統在注末明甚

仁也者章 此章言仁恩須人人能宏道也

孔子之去魯章 此章蓋言孔子周流不遇則去也

危於陳蔡章 此章言孔子見危謂君子固窮窮不

變道上下無交無賢援也

殆殆章 此章言正已信心不患衆口衆口誼譁大

聖所有況于凡品之所能禦者也

賢者章 此章言以明照闇。闇者以闇。以闇責明。闇

者愈迷。賢者可遵。誠今之非也。

孟子謂高子章 此章言聖人之道。學而時習。舍而

弗修。猶茅是塞。明爲善之不可倦者也。

禹之聲章 此章言前聖後聖。所尚者同。三王一體

何得相踰。欲以追奮。未達一隅。孟子言之。將以啓

其蒙也。

齊饑章 此章言可爲則從。不可則止。言善見用。得

其時也。非時逆指。猶若馮婦搏虎無已。必有害也。



口之於味章 此章言尊德樂道不追佚性治性勤  
禮不專委命君子所能小人所病究言其事以勸  
戒者也

浩生不害章 此章言神聖以下優劣異差樂正好  
善應下二科是以孟子爲之喜者也

逃墨章 此章言驅邪反正斯可矣來者不拒追其  
前罪君子甚之以爲過者也

有布縷章 此章言原心量力政之善者繇役並興  
以致離殍養民輕斂君之道也

諸侯之寶章

此章言寶此三者以爲國珍寶

玩以歿其身諸侯如茲永無患也

佑案如茲當作知此

盆成括章

此章言小智自矜藏怨之府勞謙終吉

者也

孟子之滕章

此章言教誨之道受之如海百川移

流不得有拒雖獨竊屨非已所絕順答小人小人

自咎者也

佑案注以夫子之設科爲孟子曰夫我設教授之

科云云則漢本經文子字作予故其爲章指如此  
朱子蓋從宋時俗本而轉議舊讀之非說詳前卷  
學者可以合參

人皆有所不忍章 此章言善恕行義充大其美無  
受爾汝何施不可取人不知失其臧否比之穿踰  
之類者也

言近章 此章言道之善當求諸已而責於人君子  
尤之況以妄苦言失務者也

堯舜章 此章言君子之行動合禮中不惑禍福修

身俟終堯舜之盛湯武之隆不是過也

說大人章

此章言富貴而驕自遺咎也茅茨采椽

聖堯表也以賤說貴懼有蕩心心謂彼陋以寧我神故以所不爲爲之寶玩者也

伯案茅茨二句夾雜可去寶玩語俚疑有誤

養心章

此章言清淨寡欲德之高者音聚積實穢

行之下廉者招福濁者連禍雖有不然蓋非常道是以正路不可不由也

伯案此章粗鄙由于誤解存不存不知以心言而

以不存爲少欲而亡者。謂遭橫暴。若單豹臥深山。  
遇飢虎之類。存謂貪而不亡。蒙先人德業。若晉樂  
壓之類。此漢儒之陋也。單豹事見莊子。與前非禮  
之禮章。注言陳質娶婦而長拜之。疏皆不能指證。  
并附有以待考。

曾皙章。此章言曾參至孝。思親異心。羊棗之感。終  
身不嘗。孟子嘉之。

信案數語無意義。凡各章指閒有隨章句敷衍而  
成者。疑不免後人之攙補矣。

孔子在陳章。此章言士行有科人有等級。中道爲上。狂狷不合。似是而非。色厲內荏。鄉原之惡。聖人所甚。反經躬行。民化于已。子率以正。孰敢不正之謂也。

由堯舜章。此章言天地剖判。開元更始。三皇以來。人倫攸敘。宏析道德。莫貴聖人。聖人不出。名世承間。雖有期限。蓋有過不過焉。是以仲尼至獲麟而止筆。孟子亦有乎爾終於篇章者也。伯案此章乃趙氏所最着意。深體經文歷敘道統。

正旨以爲七篇十四卷之大結束者也。音義云然而無有乎爾則亦無有乎爾陸本作然而無乎爾則亦有乎爾云孟子意自以當之無乎爾有乎爾疑之也此意以況絕筆于獲麟也皆承注鄭重言之趙注大率每章別爲之指卽在注末或間在首與或有所缺畧爲後人行益今旣失其本真難可遽斷考于音義已可得其梗概而疏于各章首必具述之各卷首又總撮之其文時簡時煩語多古韻與衍肆出與全疏體段判不相入雖不少疵蒙

要之非作僞人所能爲。且有疏首云云如是。而疏末復標爲注。疏中全非其旨者。益知非疏所自爲。而或猶謬認爲疏之提綱。使千百年漢學本末。蕪蔽于勦說雷同之手。予之重輯。烏能已已。戊申五月并識。

計共九千六百字有奇

乾隆六十年六月泉州安溪縣學生員謝大馨付梓